

Pangasinan - Sondalo Masanton Sulat - Soldiers Scriptures

Efeso 6:10-18

- 10 Kaonuran, mampabiskeg kayo diad pikakasakey yod Katawan tan diad tulong na mabiskeg a pakayari to.**
- 11 Amin ya armas ya iiter na Dios ed sikayo so isolung yo, pian nayarian yon labanay panamalingo na Diablo.**
- 12 Ta saray kalaban tayo et aliwa ran totoo, no ag ingen saray maoges ya ispiritual a pakayari ed mangatatawen a mundo, saray manoley, saray walay pakayari, tan saray panguloy mundo ed sayan ambilonget a panaon.**
- 13 Kanyan isolung yo la ra natay armas na Dios! No onsabi lad satay agew a maoges, nayarian yon labanan iray kalaban yo, tan kasumpal na pilaban yo, mabiskeg ki nin manalalagey.**
- 14 Kanyan mamparaan kayo lawas; ibalkes yo so katwaan, isolung yoy katonungan a sanggay pagew yo,**
- 15 tan isolung yoy sapatos ed sali yo a mamparaan ed pangipulong yoy Maung a Balitan mangiter na kareenan.**
- 16 Bembenan yo lawas so pananisia a panangga tan pangerep ed amin a panan mandarlang ya ipapana na samay Maoges.**
- 17 Isolung yon pinagkahilmit yo so kilalaban, tan ala yoy salitay Dios a sikatoy ispadan iiter na Ispiritu.**
- 18 Gawa yo ra yan amin diad panamegley na pikakasi tan mikrew kayoy tulong na Dios. Mampikasi kayo lawas diad panangiwanwan na Ispiritu. Kanyan mamparaan kayo lawas tan ag ki ontotonda; ituloy yon ipikasi ray amin a totooy Dios.**

Salmo 91:1-16

- 1 Siopamay onlan onsalimbeng ed Katawan, siopamay mansiansiad silong na panangyagel na Makapanyarin-amin,**
- 2 nayarian ton ibagad Katawan, Sikay salimbeng tan manangyagel ko!**
Sikay Dios ko, sika so panmamatalekan ko.
- 3 Andi-saew ya ipaliis to kad amin a maamut a kaatapan, tan diad amin a makapatey iran salot.**
- 4 Sayakopen to kad saray payak to; arawi kad kaatapan diad silong na panangasikaso to; iyagel tan ilaban ka na inkatoor to.**
- 5 Ag mo nepeg so ontakot ed saray kaatapan no labi, odino diad biglan idogpa na saray kalaban no agew,**

- 6 odino diad saray salot ya onsabi no ambilonget, odino diad saray kaogsan a mamatey no maliwawa.**
- 7 Anggan bilang sanlibon totoo natumban inatey ed abay mo, samplon libo ed kaliber-liber mo, anggapoy maoges a nagawad sika.**
- 8 Onnengneng ka et naimatunan mo no panoy kadusa da ray totoon maoges.**
- 9 Lapud impasen mon manangyagel moy Katawan, tan manangilaban moy Sankatageyan,**
- 10 anggapoy maoges a nagawad sika, tan anggapoy inkaruksan nagawad abay na abung mo.**
- 11 Iganggan na Dios iray anghil ton mangasikasod sika, tan mangyagel ed sikad inerman a laen mo.**
- 12 Ampayaen da kad lima ra, pian diad bato anggan saray salim ag mo ra nitopa.**
- 13 Gatinan mo ray lion tan saray oleg, saray masesebeg a lion tan saray nanditan oleg.**
- 14 Kuay Dios, llaban ko ray mangaarod siak, tan iyagel ko ray mamibirbir ed siak a Katawan.**
- 15 No ontawag irad siak ebatan ko ra; no wala rad gunigon ibaan ko ra. Iyagel tan pagalangan ko ra.**
- 16 Tumangan ko ra na andokey a bilay, tan ilaban ko ra.**

Salmo 18:1-50

- 1 Inararo ta ka, O Katawan! Sika so manangyagel ko.**
- 2 Say Katawan so manangilaban ko; sikatoy mabiskeg a tirinsirak. Say Dios ko so manangyagel ko; tan no kaibak anggapoy pagpagak. Sikatoy singa samper a manasanib ed siak; iyaagel to ak tan iyaarawi to ak ed kaatapan.**
- 3 Ontatawag ak ed Katawan, et iyagel to ak ed saray kalaban ko. Idayew yoy Katawan!**
- 4 Walad kaliber-liber ko so kaatapan na patey; saray daluyon a managderal tinatabunan da ak.**
- 5 Walad kaliber-liber ko so kaatapan na patey tan say lobuk intaryaan to ak na patit.**
- 6 Nen asabian ak na segsegang, tinmawag ak ed Katawan; kinmerew ak ed Dios ko na tulong to. Diad timple to dinengel toy bosis ko; dinengel toy ikekerew koy tulong.**
- 7 Insan ginmiwgiw tan yinmegyeg so dalin; ginmalaw tan ayegyeg iray pundasion na kapalandeyan tan amasnuk so Dios.**
- 8 Pinmaway so asewek ed eleng to, pinmaway so manliub ya apoy tan mandarlang a ngalab ed sangi to.**

- 9 Inlokyab toy tawen insan inmakseb; walay makapal a lorem ed silong na saray dapan to.**
- 10 Kinmabayod kirubin to, insan tinmikyab; linmogan ed saray payak na dagem.**
- 11 Nankobut na bilonget; aliber na makapal a lorem a napnoy danum.**
- 12 Pinmaway ed kirmat a walad arapan to iray kristal tan saray kidyam na apoy tan tinmalus irad makapal a lorem.**
- 13 Insan manlapud tawen, kinmarul so Katawan; tan nadngel so bosis na Dios a Sankatageyan.**
- 14 Ataytayak iray kalaban to nen pinapana to ra; diad panamegley na saray kirmat, pinapakoyat to ra.**
- 15 Pinmaway so dalem na dayat tan alokasan iray pundasion na mundo, nen nampasnukan mo ray kalaban mo, Katawan, tan ineyagan mo ray maksil lapud sanuk mo.**
- 16 Manlapud tagey, say Katawan ginawat to ak tan binembenan to ak; inagwat to ak ed araldalem a danum.**
- 17 Inyagel to ak ed saray makapanyarin kalaban ko, tan amin da ray mamobosul ed siak, ta ag ko nayariay ontan lan inkabiskeg da!**
- 18 Dinogpaan da ak nen maniirap ak, balet inyagel ak na Katawan.**
- 19 Inekal to ak ed kaatapan; inlaban to ak, ta makaliliket ed siak.**
- 20 Tutumangan ak na Katawan lapud matonung ak; bibindisionan to ak lapud anggapoy kasalanan ko.**
- 21 Tinoluk koy ganggan na Katawan; ag ko imbeneg so Dios ko.**
- 22 Inonur koy amin a ganggan to; ag ko impolisay iray bilibilin to.**
- 23 Amta ton anggapoy kasalanan ko, tan inarawian koy kaogsan.**
- 24 Kanyan tutumangan to ak lapud matonung ak, tan lapud amta ton anggapoy kasalanan ko.**
- 25 Matoor ka, Katawan, ed saray matoor ed sika, tan nagnap so inkamaung mod saray totoon ayadyari.**
- 26 Malinis so ipapatnag mod saray malinis so panagbilay da, balet mapasnuk kad saray mauges so panagbilay da.**
- 27 Iyaagel mo ray totoon mauyamo, balet papaabebaen mo ray mapaatagey.**
- 28 O Katawan, iitdan mo ak na liwawa; papaliwawaen moy bilonget ko.**
- 29 Iitdan mo ak na biskeg ya ondogpad saray kalaban ko, tan pakayari a manakep ed saray tirinsira ra.**
- 30 Ayadyari ray gawa na sayan Dios, napanmatalkan iray salita to! Aliling toy samper ed amin da ray papaiyagel ed sikato.**
- 31 Bukbukor na Katawan so Dios; say Dios labat so manangyagel tayo.**
- 32 Sayan Dios a mamapabiskeg ed siak, eekalen toy kaatapan ed dalan ko.**
- 33 Gagawaen to ak a singa impansaliy ulsa; iyaarawi to ak ed kaatapan**

diad kapalandeyan.

**34 Babangatan to ak ed pibabakal, pian nayarian kon ikanay
sankabiskegan a pana.**

**35 O Katawan, iyaagel tan ilalaban mo ak; lapud pananulong mo nagmaiw
ak a matalonggaring, tan lapud pakayarim niarawi ak ed kaatapan.**

36 Ag mo ak inabuloyan ya adakep, tan ag ak balut atumba.

**37 Oosilan ko ray kalaban ko, et naeerel ko ra; ag ko ra tondaan ya anggad
ag ko ra napatey.**

**38 Pepekpeken ko ra, et ag ira makabangon; natutumba ran atalo ed
saliyan ko.**

39 Iitdan mo ak na biskeg a mibakal, tan pananalo ed saray kalaban ko.

40 Pababatiken mo ray kalaban ko; papateyen ko ray mamobosul ed siak.

**41 Onkekerew ira na tulong, balet anggapoy mangilaban ed sikara;
mikakasi rad Katawan, balet ag to ra ebatan.**

**42 Mekmekmeken ko ra, et magmaliw iran singa dabuk ya ititikyab na
dagem. Gagatinan ko ran singa pitek ed saray dahan.**

**43 Inliktar mo ak ed saray totoon mananumpa, tan ginawa mo ak a manoley
ed saray bansa; panlilingkuran ak natan na saray totoon ag ko kabat nen
saman.**

**44 Dadakmomoan ak na saray totoon taga arum a bansa; no narengel da
ak, ononur ira.**

**45 Onkakapoy so linawa ra tan manggiwgiw iran onsisingger a manlapud
saray tirinsira ra.**

**46 Say Katawan et mabilay! Nadayew komun so manangyagel ko! Ibawag
yoy talonggaring na Dios a manangilaban ko.**

**47 Panataloen to ak ed saray kalaban ko; pinasuko tod pakaooley ko iray
bansa;**

**48 tan ililiktar to ak ed saray kalaban ko. Katawan, sikay mangiiter ed siak
na pananalo ed saray kalaban ko tan sikay mangyaagel ed siak ed saray
maruksan totoo.**

**49 Kanyan idadayew ta ka diad pegley da ray bansa; kakantaan ta ka na
panangidayew.**

**50 Say Dios so mangiiter na saray pananalo ed arin impasen to; ag
mangoomay panangaro tod toon pinili to, a si David tan diad saray
kabyangay boleg to, diad ando lan ando.**